

**Nunat Avannarliit Killiit Siunnersuisoqatigiiffiata kaammattuutit aalajangersagaanik nr. 2/2025-mik Inatsisartut ilaliinissaannik siunnersuut: Nunat Avannarliit Killiit Siunnersuisoqatigiiffiata Savalimmiuni naalakkersuisunut, Kalaallit Nunaanni naalakkersuisunut Islandimilu naalakkersuisunut kaammattuutigaa, • Nunani avannarlerni killerni naalakkersuisunut ilaasortat attaveqaasersuutitut inuiaqatigiit ingerlanneqarnerannut pingaarutilinnut, internettimut nalunaarasuartaatitigullu attaveqaatitut, akisussaasut naapissasut Atlantikullu avannarpasinnerusortaani attaveqaqatigiinnermut internettimullu attaveqaasersuutit inuiaqatigiinnut pingaarutillit, minnerunngitsumik imaatigut kabelit qaammataasatigullu attaveqaatit, isumannaassusiat oqallisiginiarlugu, • Nunani avannarlerni killerni naalakkersuisunut ilaasortat attaveqaasersuutitut inuiaqatigiit ingerlanneqarnerannut pingaarutilinnut akisussaasuusut naapinnerminnut atatillugu misissussagaat Atlantikup avannarpasinnerusortaani nunat imaatigut kabelii qaammataasatigullu attaveqaataat eqqarsaatigalugit sillimaniarneq upalungaarsimanermullu pilersaarutit pillugit suleqatigiinnissamut tunngavissaqarnerisooq.**  
(Aallartitat siulittaasuat Pipaluk Lynge)

### **Akissuteqaat**

(Ineqarnermut, Attaveqaasersuutitut, Isorliunerusunut Upalungaarsimanermullu Naalakkersuisooq)

### **Siullermeerneqarnera**

Nunat Avannarliit Killiit Siunnersuisoqatigiiffiat qulequttamik pingaarutilimmik oqallisissannortitsimmat, Naalakkersuisut sinnerlugit qutsavigaara.

Kalaallit Nunaanni Island aamma Savalimmiut assigalugit inuiaqatigiit ullutsinnut malinnaasuupput, nalunaarasuartaatitigut atassuteqarnermik ingerlalluartumik pingitsuisinnaanatik. Imaatigut kabelit qaammataasatigullu attaveqarnerit, tassunga atatillugu attaveqaasersuutaapput pisariaqartinneqartut aammalu inuiaqatigiinni qarasaasiatigut ataqatigiissinnaassuseqarnermut aalajangiisuulluinnarlutik. Nunat Avannarliit Killiit ikittuinnarnik innuttaqarput aammalu nunanut sanilinit ungasissusaa isorartoorujussuulluni. Tamatuma nunat sunnertiasunngortippai, pissutigalugu nunanut allanut nalunaarasuartaatitigut attaveqaatit ikittuinnaammata.

Nalunaarasuartaatitigut attaveqaasersuutit pisariaqartinneqartut isumannaarnissaat Naalakkersuisunit ukiuni kingullerni ukkatarinerulersimavarput. Tamanna suliniuteqarnermik kinguneqarsimavoq, pingortitami imaluunniit inunniit navianartorsiortitsinernut

tunngatillugu nalunaarasuartaatitigut attaveqaasersuutitut isumannaallisaanermik upalungaarsimanermillu nukittorsaasussanik. Naalakkersuisunit nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisaata allanngortinnissaanut siunnersuut suliarileruttorparput, tassani isumannaarinissamut upalungaarsimanermullu tunngatillugu Tusass A/S-imut piumasaqaatit erseqqissarneqassallutik, aammalu nunani tamalaani attaveqarnernik amerlanerusunik pilersitsinissap aningaasalersorneqarnissaanut tunngatillugu Naalakkersuisunit Tusass A/S tapersorsorparput.

Nalunaarasuartaatitigut attaveqaasersuutit pisariaqartinneqartut isumannaarnissaannut pisariaqartitsineq tassani unitsinneqarsinnaanngilaq. Taamaattumik Atlantikup avannaani nalunaarasuartaatitigut atassuteqarnermut tunngatillugu isumannaallisaaneq upalungaarsimanermullu pilersaarutit pillugit suleqatigiinnissamut tunngavissaqarnersoq, misissornissaa naleqqutissaaq. Taamaattorli Naalakkersuisunit tunngaviusumik isumaqarpugut, attaveqaatit pingaarutillit oqartussaaffigineqarnissaat pisariaqartoq.

Naalakkersuisunit matumuuna siunnersuutip akuerineqarnissaa inassutigaarput.